

開原縣志

全  
自第

冊  
三

98  
冊


4819

4

內第  
三  
函



92032



人事

政治者敷布由於政府人事者習俗成自人民古昔盛時風化大行民情篤厚人事亦淳樸而鮮詐虞即或政治偶乖而故家遺俗先哲遺型猶可維持於不敝中國歷代遞嬗人事幾經變動至民國建立尊重民權而民族民生皆由此同享其利益此人事尤不容輕視時也所望芸芸衆庶共勉前途不越乎政治之範圍而足樹人事之模範庶無負首倡民治者之苦衷焉



## 種族

開原屬遼東爲中國東北部居民種族遠代無可考查然自春秋以後統系尙有可述茲據近人所著中國民族之研究及中古史參考書與通鑑諸書參證之而節錄其概略焉

### 漢族

漢族之名始於西漢時武帝用兵四裔擴張領土故人皆以漢稱中國而並稱中國之種族爲漢族實與蒙古族爲二種西人稱爲蒙古利亞族非是蓋因元太祖爲蒙古族兵力嘗達歐洲故混稱之也爰取歷代種族有關於開原之漢族者分列於下

甲 烏桓 中國東北方之民族在春秋時代爲北狄後又分烏桓鮮卑爲東胡其雜居中國者在戰國末年已完全同化於漢族開原之地當時尙未列中國版圖爲烏桓占領與鮮卑同役屬於匈奴秦始皇逐匈奴以其地置遼東郡漢武帝時驃騎大將軍霍去病攻匈奴東部烏桓請降朝廷徙之於上谷遼東遼西各地遼東即今奉天遼瀋道

東部開原當在其部中當時開原之居民漢族尙稀徙烏桓而居之

乙 鮮卑 東漢桓帝時鮮卑大人檀石槐南抄中國之沿邊東徂吉林西境之夫餘當時開原在夫餘境內三國時代中國內部分裂漢族互訐無暇注意外族鮮卑種族各部落乘勢潛滋晉雖統一中國集權中央而對外族之抵抗力驟弱當時開原爲慕容氏所據至愍帝時後魏主拓拔鬱律氏立英武善用兵東兼勿吉以西即今吉林黑龍江以西之地開原亦在其範圍中居民種族仍以鮮卑爲盛蓋拓拔氏亦鮮卑種也循至南北朝與漢族爭雄尋改拓拔爲元氏歷代多英主最崇拜中國文化兼用漢族人提倡不遺餘力自貴族起首先同化於漢族於是鮮卑民族全體從風而靡文化程度驟然發達

丙 契丹 南北朝之初鮮卑別種曰契丹者佔內蒙古東部一帶地唐中葉後拓地漸廣唐末其大人耶律阿保機征伐四鄰東向擊降渤海國即今朝鮮及滿洲境「開原在內」曾於境內置密雲縣徙所俘密雲之民居之後改名慶雲縣「即今城西慶雲

堡一境內漢族日臻繁盛至太宗耶律德光改國號曰遼以其種族所居皆遼河流域也至世宗耶律兀欲立慕中華風俗多用晉臣國人不附而弑之實足爲同化漢族之阻碍也

丁女真 女真之先出靺鞨靺鞨本號勿吉居古肅慎地開原爲其所屬隋時統稱靺鞨後建國號曰渤海五代時契丹盡取渤海地遂附契丹居混同江濱在江南岸者號曰熟女真金始祖涵普初從高麗來居完顏部因以爲氏至阿古打時敗遼稱帝以金之色白不變不壞完顏部亦色白故稱國號曰金嘗以兀朮伐宋下令禁民漢服又令髡髮遵金俗可知當時金屬各地漢族最多也

明時滿洲日強開原與滿洲僅隔邊塞防禦尤嚴王之誥全遼志叙謂邊鄙甌越之地華夷雜糅之民迫進胡俗易動難安者是也故先後設三萬衛遼海衛所於城內而分設各關堡於城外招徠日衆戶族日繁雖屢經兵燹而地多沃壤居民利其利無所遷移漢族仍不減少清帝入關滿族駐防之兵又均化爲土著一切言語禮俗漸與漢族相混合自

康熙三年設治後由國家招徠者固多由個人遷徙而至者亦不少其他由經商而落戶者有之由流寓或發遣而入籍者亦間有之其人數以山東直隸爲最多而山西次之河南又次之又有漢軍者其先亦漢族也因清初倡先歸順或特有戰功別爲一種亦稱漢軍旗族清室之待遇厚不及滿族而優於漢族此外更有邊台人專司挑壕修邊又有驛站人專司傳遞公文此二種人多屬清初三藩降卒又間有旗人犯竊銷擋爲民者亦有民人入旗編入漢軍者前時雖待遇不同顯分階級民國肇興待遇皆歸平等焉

### 滿族

滿洲二字滿語譯作滿珠或曰即文殊二字文殊本佛名其義謂清帝爲文殊之化身用以籠絡各族之人心清太祖稱帝時國號原稱後金及皇太極嗣位因不適於對待外族及招徠漢族之用乃改爲清其族通古斯種也通古斯即東胡之轉音在滿洲部者分國五曰蘇克蘇護河曰渾河曰完顏曰棟鄂曰哲陳明代統稱爲建州女真又有海西女真扈倫四國曰葉赫曰哈達曰輝發曰烏拉當滿洲諸部之北明人倚哈達爲南關葉赫爲

北關拱衛開原鐵嶺爲朔方屏蔽自開撫順關互市以後清太祖奴爾哈赤乘勢克完顏而滿洲環境之五部皆隸屬之太宗繼明入主中國開原地居邊塞駐防滿洲兵較多年久遂爲土著語言文字皆不異於漢族後又有由他部改隸滿洲者故別舊屬者爲陳滿洲改隸者爲新滿洲實則並無差異也舊時滿族與漢族猶有不交產不結婚之制清末始漸化除民國以來益覺畛域胥泯同化於漢族矣

### 蒙古族

蒙古族人唐時曰蒙兀金時曰蒙輔自元太祖鐵木真崛起漠北征服各部拓地最廣跨有歐亞二洲地廣建宗藩世祖忽必列入主中華間用漢人以興文化如許衡姚樞等皆爲任用此其漸同化於漢族也清繼明後因有種族關係內附日多朝廷編入旗籍與滿洲漢軍皆分八旗載入冊檔外有錫伯及巴爾虎人亦皆蒙古之種族開原境內蒙古族雖不甚多然西與北二方面村落住戶每有之率皆習漢族文字語言矣

### 回族



回族即阿剌伯人古之回紇種也唐貞觀時始入中國清時征服準噶爾大小和卓木亞洲土爾其回族歸附者日衆開原鄉居者甚少而縣城東南東北二隅爲其族簇居地回民多以屠牛及小販爲業一切禮俗飲食與他族不同各門首皆用阿剌伯文字爲標識蓋其保種之嚴雖歷久而不變然自學制變更其族亦首辦學校可謂不同化中之同化矣

按以上所舉推之開原爲烏桓鮮卑契丹及女真蒙古雜居地歷代殘殺蹂躪民生屢受其毒自元清兩代烏桓鮮卑契丹等族漸化爲滿蒙二族之分子而滿蒙二族又漸化爲漢族之新分子於是逐漸腐舊之漢族經各族侵擾之餘未爲他族所化且於本族內加入許多新分子焉血統雖云混合而民智益開通此後文治武功更當蒸蒸日上非復漢時之舊觀矣

# 氏族

巨室之所慕一國慕之孟子論爲德教之行溢乎四海氏族之關於國家社會誠重要也開原自漢唐以及元明地當邊塞兵燹頻經土居者遷徙流離之不暇遑云生聚清初設治始漸招徠八旗兵官多由駐防卜築而漢族之經商墾田者亦來歸日衆約而計之始則旗族繁滋繼則民族輻輳民國共和化除畛域科舉又變爲學校人文日盛氏族之蕃衍自能逐漸增多亦鄉史之榮譽也但既稱爲族則名望昭著之士必不止一人茲編於一族之內有二人以上之顯達者方始錄入餘暫缺焉

鈕鈷祿氏 簡稱郎姓清慈安太后母家裔也世居城東郎家屯八社等處烏雲珠北洋優級師範選科畢業薦任職六等嘉禾章歷任黑龍江財政廳科員省長公署科員兼庶務會計主任弟札昆珠奉天農林學校畢業歷充瞻榆縣公欵處主任商務會會長碩氏 居城東一區郎家屯碩斌祥清武進士曾充墾荒委員兄弟五人皆以功名顯傳爲五子登科時人榮之

戴氏 居城內東街及城西五區慶雲堡等處其先祖穆克譚清太祖時爲十六大臣之

一那蘇圖歷任兩江湖廣閩浙兩廣總督直隸河道總督薩穆哈任吉林副都統永舒  
乾隆間來開任城守尉自此在開落戶瑞珍日本法政大學畢業曾充桓仁縣知事本  
邑教育會長長春稅捐局長侄溥潤日本東斌學校兵學部本科畢業博蔭北京國立  
大學文科畢業現充吉林財政廳科員

趙氏 居城內南街關帝廟胡同賡麟清進士曾任禮部主事賡祺賡乾均文庠生賡雲  
舉人歷任甘肅涇原狄道等縣知事曾佑北京國立大學畢業現充洮昂鐵路局科長  
嘉任北京國立大學畢業曾充西安新民等縣監督審判官東北大學教授現充邊防  
司令長官公署軍法官

趙氏 居城北街菊生由歲貢生任教官子家幹光緒壬寅科舉人歷任北京法部郎中  
浙江龍游等縣知事現充省公署秘書孫鴻業北京國立大學經濟科畢業法學士歷  
充浙江省公署秘書科長菸酒事務局秘書科長太平洋會議中國代表團委員關稅

監督公署秘書現任懷德稅捐局長

譚氏 居城內南街城東張相屯城西和順屯等村書春書紳書銘清文庠生書紳奉天法政學校畢業曾充京禮部贊禮郎民國省議會議員榆樹懷來濱江海倫林甸泰來等縣知事書銘日本法政大學畢業被選爲北京諮政院議員現充榆樹稅捐局局長

傅氏 居城西三台子良弼由進士官盛京戶部侍郎次子國陰任河南衛輝知府

富氏 居城北頭道溝文卿清文庠生曾充本邑警察局長廉卿以部郎出守彰德府慶麟奉天法政專門學校畢業曾充黑龍江第二菸酒事務所長慶良慶咸均奉天法政專門學校畢業

趙氏 居城內東街國璞清文庠生曾任本邑警察局紳董奉天警務處科長侄鼎銘師範畢業曾充縣立第三小學校校長教育公所事務員現充營口稅捐局會計主任

那氏 居城西三台子國銓清文庠生子雲鵬奉天優級師範選科以最優等畢業獎給舉人籤分法部小京官曾任台安縣知事

韓氏 居邑西四社鎮三清文庠生肆三歲貢生鍾玘拔貢生

董氏 居城南大孟屯文德清歲貢生文理之威紹舒均文庠生

段氏 居城內南街段氏自前清雍正年由山西徐溝縣遷居斯土以商業起家三傳至雲峯道光乙酉拔貢候選直隸州州判四傳至復享廩膳生加捐直隸州州同復陽文庠生五傳至樹聲歲貢生樹桐文庠生六傳至毓奇附貢生毓椿文庠生七傳式程北京高等師範畢業奉天省立第二中學校長省視學現任務於西安煤礦公司式寬東北大學電工系畢業工學士

安氏 居邑南四寨子慶恩係盛京禮部員外郎生子二人長子景連係筆帖式充開倉倉官之職二子景仁係文庠生教授有年生徒多有發達者其員外郎曾與其父和爾錦並其叔勒力錦上請賜以奉政大夫封典二軸駿鳴清壬午科舉人曾任光祿寺署正子金鐸日本高等警察學校畢業會充本邑警察南路東南路區官孫永珍奉天英文專科學校畢業現充遼寧第一高級中學英文教習永瑞北京國立大學法科經濟

系畢業赴德留學肄業於萊比西大學經濟銀行科

劉氏 居城西二社書閣清文庠生曾充西鎮巡警局紳董胞侄沛日本早稻田大學法律科畢業歷任安徽靈璧鳳台天長阜陽盱眙等縣知事

劉氏 居城南尚陽堡海瀾教習兄化成宗沛宗堯侄伯卿寅卿季卿少卿等均諸生伯子秉鈞法政畢業歷充法官寅卿子秉璋荐任職任用充遼陽稅捐局長現充陸軍糧秣廠上校總務科長秉良曾充一等軍需官現充糧秣廠少校科員

王氏 居南街數世鄉貢王應祥優貢業廣歲貢

羅氏 居城西五區前施家堡羅福陞阿清光緒時充任盛京旗滿洲佐領羅寶和光緒時充三姓後路統領羅玉和民國初年充興京總管羅成和光緒間充開原廂紅旗校正羅貴和清滿號生員被選爲第 屆省議員羅錦現充吉林砲兵連長羅駿良北京大學法律科畢業前充遼陽審判廳書記官西安臨時承審員行政科員兼辦清鄉事新民縣司法公署檢察員吉林警務處視察長德惠縣警察所長

關氏 居邑西二社窩棚德榮前清防禦孫恩裕旅順工業專門學校畢業現充迫擊礮廠股員

關氏 城西譚相公台文會任奉天發審處問官法庫邊門防守禦文治字閣卿歷充江省地方檢察廳書記官蘭西巴彥克山等縣警察所股員松黑兩江郵船局營業長現任甘南設治局第二科科长

蕭氏 居本城南區下房身屯爲該村之巨族約二十餘戶國英字萃廷光緒年入泮考職錄取第一名候補巡檢國治字化亭光緒季年入泮才識夙著少有文名後科舉廢入政界宦遊甚久在鄉熱心公益急人如己嗣被徵市政公所市長擘畫甚多惜身體素弱於民國十六年卒致懷才未展抱恨終世云

陳氏 居城南四區婁相屯陳芳字香圃清道光二十五年歲貢生陳芝字德五清咸豐二十五年入泮

陳氏 居城南四區榆樹堡屯陳德陞清五品藍翎校政薩靈阿清文庠生福春福元均

奉天兩級師範學校畢業賡舜木邑縣立師範學校本科畢業福崑本邑簡易師範畢業賡義奉天法政學校法律別科畢業福善奉天東北大學工科機械系畢業他若全斌成文沛林等已入東北大學而未畢業者尙不乏人

陳氏 居城東南八區一面城河南陳維新字樹藩清同知銜補用州同宣統二年充本邑東南路學董陳起耀字勝清盛京內務府百總宣統二年被選爲本邑東南鎮議事會議員現年逾古稀精神矍鑠踴躍公益長子維祿次子維一季子若東次孫兆豐堂孫錫三均置身學界人服其訓導有方陳起邦字雲閣咸豐壬戌年恩科武舉辛未揀選營守備陳兆武字迺勳山東陸軍學校畢業歷充山東省濰縣陸軍步兵連長現在江省蘭溪縣二區區官兼清鄉隊長

田氏 居城南四區大孫家台田其均清拔貢生銓選府同知田開字字子腴優附生奉天自治研究所法官養成所畢業歷充本縣教育公所總董復縣審檢所幫審員遼中承審員田其芹字香閣田英字花軒田駿年字友聲均清文庠生



王氏 居城北三道溝王鴻賓字寅卿清文庠生子延齡字鶴橋日本東京國立大學肄業孫立士字聘之日本東京國立高等工科畢業遼寧四先公司技師

王氏 居本城東一區西老古峪王仍蘭字者香奉天法政專門學校畢業歷充瀋陽琿春延吉地方廳推事族兄王鎮國字撫辰本邑師範傳習畢業充任教育公所事務員有年成績頗著領有教育廳一等獎章子王敬所在教育多年領有教育廳三等獎章現充吉林講武堂少校副官

傅氏 居城北二道溝札克唐阿馬隊長子文化軒世襲雲騎尉銘咸一曾充本邑警察局紳董

閻氏 居城一區閻家堡子閻奎陞清驍騎校成德字捷三浙江警備隊統帶官長子金祥陸軍軍官學校畢業曾充吉林憲兵營長次子國祥三子家祥均北京民國大學畢業

馬氏 居城東一區尙陽堡馬維藩清大教習馬維坤馬維垣均文庠生馬芝田充保甲

辦事處委員農務會會長子宗薌清拔貢生燕京大學畢業現充東北大學教授

陳氏 居城東一區尚陽堡陳冠卿清文庠生子孟乾歲貢生

張氏 居城東南八區黃旗寨張鉞字成秋日本仕官學校畢業充前充奉天督軍署參謀  
長族中猶有登仕版者

劉氏 居城東一區八社劉識遠字靜軒清文庠生侄廷輔子廷鑑均入泮孫蔭柏蔭樟  
均師範本科畢業劉廷颺字賡臣清歲貢生子蔭桐亦入泮廷良字弼臣奉天師範體  
育美術科畢業現充工兵團上尉書記官

劉氏 世居城南四區五寨子屯勤耕課讀累世書香劉鍾麟字伯臣清文庠生子克謙  
字益三奉天法政學校畢業曾充浙江省縣知事暨稅捐局長現充吉林省公署法治  
科長

敖爾多斯氏 簡姓敖蒙古旗籍其先人來宦斯土遂家焉居本城之東街詩禮傳家代  
有顯達全琦以翻譯生官員盛京刑部主事全璞由法政學堂畢業全瑛由警務學堂

畢業全琛由農業學堂畢業全璋由日本陸軍學堂畢業全琛由外國語專門學校畢業均登仕版從政有聲啓凱北京國立大學法學士歷充法曹啓元師範畢業啓先現肄業北平大學校

陳氏 居城南四區馬圈子陳鴻猷日本東斌學校兵學部本科畢業充黑龍江軍署副官長團長警備司令等職鴻謨日本東斌學校陸軍班畢業歷充駐廣東陸軍營長龍岩縣知事曾充奉天省議會議員

徐氏 居城西王家屯文華清文庠生曾充本邑勸學所總董創辦私立第一小學校子正身北京民國大學法科經濟系畢業現充洮昂鐵路局材料處主任子正心奉天本科師範畢業曾充台安縣看守所所長現充四洮鐵路局車務課文牘員孫勤學本邑中學畢業現充黑龍江富拉爾基市政分所所長

張氏 居城南三寨子應侯清文庠生歷充本邑勸學所勸學員自治研究所所長省議會議員侄江清任陸軍營長海清任陸軍團長

趙氏 居城南南街聯陞字丹九同治丁卯科舉人繼昌字明川光緒乙酉科舉人

丁氏 居城西台子溝寶綸奉天農業學校畢業歷充農林部技士兼墾牧試驗場幫辦農商部技師第一種牧畜試驗場場長農工科僉事力士北洋高等工藝專門學校畢業歷充本邑職業學校第一學校校長

關氏 居城內南街春溥奉天法政學校畢業歷充江省青岡拜泉通河承審奉懷等縣承審員陸軍第一混成旅第一團執法官後任梨樹縣審判官在職病故叔平奉天農業學校畢業曾充奉天實業廳科員安東鴨綠江中日合辦採木公司副參議等職

孟氏 居城南大小孟家屯國英金尙陽堡指揮僉事名高任清河南澗池縣知縣山東武定知州東昌知府兆麟任廣東昌化縣知縣

羅氏 居城南五里堡子德立本弟阿立本子明濬孫寶書均清文庠生寶書奉天法政學校畢業考職候補巡檢曾充省議員現任伊通縣公署科長桐森奉天高級師範理化科畢業楓森亦師範畢業鶴鳴外國語學校業業

高氏 居城內東街玉堂清恩貢生歷充本邑教育公所所長商務會會長弟玉衡清增廣生歷充警察局董事收捐處主任商務會會長長子昶奉天優級師範選科畢業任本邑中學校校長農務會會長次子崇日本早稻田大學政治經濟科畢業歷任海陸軍部會計處處長兼外交委員會委員東省特別區警察管理處副處長察哈爾審判處處長現任營口稅捐局長侄謙北京鹽務大學畢業孫占春北京國立大學畢業

楊氏 居城西並西關及城南二寨子光鑑恩貢生四知清文庠生曾充本邑教育公所事務員祖榮清文庠生曾充本邑自治董事等會董事教育公所事務員蓋平縣科長現任遼陽縣第一科科長大實日本東斌學校警監部畢業法政大學畢業被選爲第一屆國會議員及軍署顧問省長公署諮議

李氏 居城東八社暨城內李新元字春華考職候選巡檢子筠笙北京國立大學畢業法科學士歷任鹽運使署秘書奉天省公署科員吉林雙山縣縣長現任海龍縣縣長筠薌外國語學校畢業現充四洮鐵路局科員

柏氏 居城東汪哆囉束桂林字雪岩陸軍軍官學校工兵科畢業歷充工兵營長團長  
現任少將工兵訓練監兼工兵研究班教育長國棟步兵教導隊畢業曾充京兆通縣  
警察所長現充鎮東縣公安局局長崢講武堂畢業步兵中校充任迫擊砲教育班班  
長

康氏 居城東一區斛米溝季封被選爲省議會議員聯舉三任侄景萃北京國立大學  
法科畢業

程氏 居邑東境第一區太平溝之章本邑自治研究所畢業民國二年舉辦自治鎮鄉  
立議董兩會被舉爲本區議事會會長程之香奉天外國語專門學校畢業現充公主  
嶺交涉佐治員民國十七年由懷德縣呈請遼寧省長公署保准荐任職存記

高氏 居城東南金家溝毓崑毓岱均文庠生

陶氏 居城內東街城南二寨子宗奇清文庠生日本法政大學畢業畢業部試舉人歷  
充新民地方審判廳廳長黑龍江漠河蘭西等縣知事春著日本東斌學校兵學部本

科畢業

傅氏 居城南新屯景霖民國六年在開通被選爲教育會長兼農務會長弟汝霖南鎮自治議事會會長民國十五年選委四區區長大中外國語專門學校畢業考取東三省外交官大東現在東北大學肄業

吳氏 居城西老虎頭文成清文庠生本邑自治研究所畢業曾充西路學董省議會議員連璞北洋高等工藝專門學校畢業曾充本邑西路學務專員

周氏 居城東喜鵲溝暨汪哆囉束濂軍官學校第五期礮兵科畢業歷充一二聯軍礮兵團長軍械處處長軍團部參謀長預備軍軍長錦縣警備司令現充軍務處處長兵工廠會辦琇琳前清優附生奉天法政學校畢業曾充海倫克山等縣承審員殺虎關常關稅局局長三四方面軍團司令部諮議現任江省東北邊防副司令署諮議琨琳奉天法政學校畢業葆權東北陸軍講武堂畢業現充工兵第一營營長葆廉外國語學校畢業現充五十一團軍需官

姬氏 居城西古城子安清刑部委主政特達副榜文光特銓均文庠生振鐸北京高級師範學校英語科畢業留學美國巴福樓大學教育學士歷任省立圖書館管理員女子職業學校校長奉天省視學現任遼寧省教育會會長兼東北大學附屬中學主任肅宸旅順高等工科畢業現任東北大學工廠主任觀宸現肄業於北平大學工學院

張氏 居城南二寨子集蔭鶴齡均文庠生翰香奉天高等師範文學專門畢業

王氏 居城西關廷才進士任三河縣知縣孫宗承進士冠羣維翰維祺均文庠生

丁氏 居城內東街係回民萬錢由附生考職巡檢分發直隸歷充本邑商務會會長市農會會長並農業試驗場長任振武吉林法政專門學校畢業

佟氏 居城西譚相公台藻宸奉天農業學校畢業農林部技士兼林場場長農商部技士兼第二種牧畜試驗場長農工部技正泮林北洋優級師範選科圖工科畢業曾充本邑師範教習及八旗小學校長椿齡曾任本邑警察局紳董及西鎮自治董事會董事



李氏 居城東一區尙陽堡少瀛秀林均文庠生

張氏 居城東一區尙陽堡惠濬兆林均文庠生

孟氏 居城東南八區打虎庄傳興清咸豐六年在山東兗州府考取主事銜亞聖裔世

襲翰林院五經博士准懸表率宗支匾額繼貞清光緒二十四年在山東衍聖府効力  
賞給家長舉士四品職銜

崔氏 居城南四區中固秋鶴原籍山東清文庠生教學數十年門下多知名士每科歲  
試採芹食餼者不絕於門福辰清歲貢生

富氏 居城西南英城和亮清武舉保宗北京中國大學畢業業仲濂奉天法政學校畢業  
其他成慶明啓應瑞仁治書銘文治熙春均登仕版

高氏 居城東三區三家子廣乾民國十五年充東北陸軍第四旅參謀志誠民國二年  
充本邑第二鄉鄉議事會會長

洪氏 居城東四家子國璋字向辰清舉人歷任法庫縣知事及某縣稅捐局局長侄文

杰奉天高級師範英文專科畢業

汪氏 芝雲奉天優級師範選科畢業子國芹北京朝陽大學畢業

傅氏 居城南四區傅家屯奇靈阿清時官浙江副都統後陞山海關都統現在宗族尙繁人稱爲奇大人家

瓜爾佳氏 滿洲人爲本邑舊族任副都統城守尉及協領佐領等職者前後相望前奉天公署之關秘書海清後任關海監督即其後裔

那穆魯都氏 滿洲人福陞任伯都訥副都統子翼綿德亦以協領署副都統事

郝氏 居城裏東街自百祿以鄉貢起身二子璞璉相繼登進士均官牧令有聲

傅氏 珽歲貢孫德宜舉人均官知縣

白氏 滿洲人居城後家世殷富雙慶福魁父子均登仕版

左氏 居城西二道溝屯及高窩棚堡耀先字質良北洋國立大學採冶學門畢業工學士留美現充東三省兵工廠礮彈廠廠長鳳周字民新北京國立大學法律科畢業法

學士現充遼寧省財政廳第一科五股股長

莊氏 世居縣城南四區中固村莊開甲清咸豐同治間曾任直隸州州判莊錄清同治光緒間由宗室左右翼漢教習任知縣莊葆華考取文庠生

羅氏 居慶雲堡德林布日本法政學校畢業曾充安圖縣知縣烏林布奉天高等警務學校畢業曾充本溪縣警務長和林布曾充陸軍連長現充陸軍礮兵訓練監部軍務處長係保定陸軍學校畢業烏林布現名操和林布改名韜

郭氏 居城南八里橋子謝家屯等村瑤文庠生纏清道光壬辰科武進士祺緒泰玉田裕齡皆文庠生裕齡現充節孝祠紳董喜良由南滿中學畢業留學東洋巖倉鐵路學校並鐵道省教習所畢業現任洮昂鐵路局運輸課課員兼軍事運輸委員

周氏 住城內東街之德由附生捐貢前曾續修縣志名重一時利凡奉天高等警察學校畢業現充東北陸軍訓練監部上校尙武警察畢業現充義縣警務長興歧奉天陸軍軍官學校畢業前充黑龍江督辦公署中校參謀現充國防第二旅上校參謀長

## 禮俗

道肇端於夫婦孝無間於存亡此婚嫁喪祭禮俗之所宜先也然國家勸農之典與人  
事酬酢之文以及鄉里之沿傳歲時之行動莫不各有所遵依故以演春宴會歲事等  
次之且人情好樂而惡憂憚勞而喜逸凡民風之勤惰厚薄胥可於此覘之故又次以  
娛樂事項勞工待遇諸事若經濟一項爲人民生活所必需故以殿諸篇後用明財用  
之不可倖得而借爲勞工提倡焉

## 婚嫁

婚禮爲禮之本各地之儀節多不同開原習俗皆以媒妁爲介紹有人欲合兩家之好向  
兩家父母探詢意旨者謂之保媒其人即謂媒人兩家意旨既同然後各以子女年庚使  
術者推算謂之合婚婚既合定擇日互相探視女家至男家謂之相看門戶男家亦略備  
布帛簪珥等物邀同媒妁至女家結定婚約謂之放定女家設席招待兩主婚家長易杯  
而飲故謂之換盅俗稱過小禮至將成婚之前一二月內由媒妁將男女年庚並納聘日

期書以紅箋送之。女家謂之通信。先擇一吉期。男家將應納聘儀及衣飾豬酒等物。親同媒妁至女家行聘。謂之過大禮。亦稱行茶。且必由教育機關購婚書。以爲明證。屆所定婚期之前一日。女家備粧奩各項器物。安置男家。謂之安嫁粧。並邀媒妁親友一同往送。謂之送親。男家亦邀集親友。謂之助忙。次日新婿同轎馬自往親迎。至女家之門。由女家人引之登堂。拜女父母。謂之謝親。即有女家預邀之送親人爲喜僮。以送之。新婦以紅帛蒙頭。由兄弟等挽扶升轎。並有男家預邀之人爲喜僮。以迎之。途間過井墓廟宇。必用紅氈障之。以防衝犯。至男家門首。候吉時下轎。用紅氈貼地。新婦踏其上。至喜棹前。共拜天地。又二人交拜。謂之拜天地。拜畢。新婿引新婦入喜房。揭去蒙首紅巾。謂之去蓋頭。新婦抱寶瓶入室。面向吉方。端坐。謂之坐福。喜娘加笄於新婦頭上。謂之上頭。女家備男家之筵席。先歛婿以角食。謂之館小飯。充早飯也。繼歛婿以盛饌。謂之館大飯。充午飯也。是日親友以錢幣致賀。謂之喜儀。男家排列盛筵。歛待女家送親之人。兼以招待賀喜諸戚友。晚間新婿新婦飲交盃酒。食寬心麵。次晨新郎携新婦先拜家堂及翁姑。再挨次拜宗族親

黨謂之分大小有贈新婦飾物或錢幣者謂之上拜過此七日或九日女家設席邀婿及  
 女謂之回酒一月後新婦歸寧謂之住對月本邑漢族之婚禮舊式如此若滿蒙漢軍各  
 族或以帳房爲喜室或以摸鬢爲禮文儀式雖云稍異而大致尙不懸殊近來歐風漸染  
 縉紳大族間有行文明結婚禮者皆於午刻行之先設禮堂各席新郎迎新婦至門外由  
 男引導員引新郎女引導員引新婦導入至禮堂前並立襄禮員唱主婚人入席介紹人  
 入席證婚人入席鼓琴員入席遂即鼓琴琴停新郎新婦相對行三鞠躬禮畢即交換飾  
 物各於婚書上蓋章遂請主婚人蓋章介紹人蓋章證婚人蓋章再鼓琴琴停請家長訓  
 詞證婚人及來賓賀辭新郎新婦答辭三鼓琴琴停新郎新婦以一鞠躬禮謝家長及介  
 紹人證婚人諸來賓鼓琴員襄禮員請介紹人退證婚人退來賓退鼓琴員退襄禮員退  
 家長退新郎新婦退禮成諸親友向家長賀喜但此不過少變遺俗新舊相兼去其蒙紅  
 帛拜天地館大小飯諸事而已惟回族婚禮不與漢族同其徵男女兩家同意與書庚帖  
 以爲證據猶不與漢族大差而結婚必用主麻日

即舊曆書午婁鬼九四日

請阿訇誦經用亞拉

伯字寫婚書皆與漢族迥異者他如崇信宗教家或祝福或誦經皆在少數姑不詳誌  
按納采納吉納徵請期親迎等儀節載之禮經婚禮備極詳明特以沿傳日久反於禮  
之所自出習焉而若忘耳開原沿用之婚禮雖稱名歧出而締結之後先儀文之設備  
其義實莫不相通今之相看門戶非即古禮之問名乎今之合婚擇日非即古禮之納  
吉乎今之換盅放定非即古禮之納采乎以至今之通信亦即古禮之請期今之過聘  
禮亦即古禮之納徵今之謝親奠鴈亦即古之親迎試爲之顧名思義仍無不一一吻  
合勿謂古今人不相及也

### 喪葬

喪葬之禮皆視爲大事但以家境不同遂視貧富以爲厚薄自父母疾革時子孫爲易新  
衣服舁置牀上環立守之俟氣絕以素帛蒙面上以錢文含口中以絲緜繫足下主祭之  
子孫緣梯至烟突側長號者三謂之指冥路殊失本義查禮喪大記云履危北面三號註  
履危立於高峻之處蓋屋之脊也三號者一號於上冀魂自天而來一號於下冀魂至地

而來一號於中冀魂自天地四方之間而來其辭則皋某復也皋長聲也蓋人子冀父母之復生故爲此聲也若云爲父母指冥路則是欲父母之速去也豈人子愛親之本義哉號畢反室視親不再生乃閤家舉哀以帛蒙尸面恐尸像形見爲人所惡即禮雜記設冑之意欲鎮惡氣故以錢納諸口欲防誤動故以絲籠臂及足男曰正寢停於中堂女曰內寢停於內室具壺漿備籠燭用人導赴神祠焚化香楮哭泣而歸每日三次至大歛止曰報廟又按死者壽數疊白紙而剪爲三連書死者姓名年歲於其上男左女右掛於門外曰門旛靈床前燃長燈供飯一盂插箸三隻上端裹以新綿曰倒頭飯子孫即日裁白布作衫著之曰孝衫延術士開列死者生辰回煞及忌鎮壓諸物於紙上粘於壁曰開殃榜大歛時昇尸入棺以香油畫死者之目曰開眼光棺上釘長釘一枚曰壽釘大歛後喪家通知親友備祭禮執芻靈主喪者手引掃帚置門旛於上倒行赴神祠前焚奠曰送行亦曰送三至七日夜五更時子孫跪院內向空中哭奠曰上望蓋取七日來復並梵經所載望鄉之說也自是每逢單七之日必有家奠曰辨七以七七爲限至百日亦同葬期擇定



後詳具死者姓名年歲並送葬一切禮儀葬期某日告之親友曰訃文送葬之前或延僧道諷經或邀親友祭送曰開弔士紳之家延僧禮請有德望者題木主曰成主親友來弔喪主奉以白布男經於腰女戴於頭曰散孝出喪之前一夕親友畢集以次祭奠曰辭靈齋醮竟夕曰坐夜發引時主喪者執旛扶柩鼓樂導前親族擁後親屬同哭而往送曰出殯亦稱發引有奠酒於路者曰路祭撒紙錢於路上曰買路錢塋於新葬地而祀神者曰祭后土就壙後焚化冥鏹芻靈畢定正方向喪主先掩土然後助葬者築土起墳家人哭之盡哀而返葬後三日詣墓哭奠培土更築墳曰圓墳百日後詣墓哭奠小祥大祥皆同以上所言惟中產以上者能行之若貧家則於送三後即出葬矣滿蒙人家大同不無小異惟孝服則百日以內滿蒙人必起居不釋衣既至百日則備香楮祭品合家或邀至親同至墳前敬奠遂釋孝服俗稱脫孝此與漢族少異者也回族喪葬與他族尤異其於人之死也等爲無常潔洗尸身而以淨白布纏裹之邀該處阿訇誦禱而歛以匣棺無論家境如何皆須速葬停喪不得逾四十八小時吉凶無所避忌先報喪於各回教家各回教

家皆須沐浴送儻葬後七日百日仍請阿訇誦經若四時墓祭則一概不設

曾子重慎終孟子大送死蓋親喪之所自盡人有同情也顧不得不可以爲悅無財不可以爲悅富貴者力足以籌措矣若貧賤之家限於財用實有不能舉辦之事能無抱恨然孔子有云喪與其易也寧戚但能哀毀盡禮足以致其誠敬亦何傷於孝思乎

### 祭祀

祭祀有二曰祭祖曰祭神漢族滿族相沿之舊制多不一致漢人之祭祖春夏秋冬各有一定之祭日此常例也或因有特別事故行之者必備三牲俎豆酒醴香燭供獻於宗譜前以伸敬意祀神則隨其誕日或曾許愿心皆設供焚香焉餘亦惟年節例祭而已滿人於祭祖而外有索倫與媽媽之祭擇日置牲陳几灌酒於牲耳牲鳴則謂之領牲以示神已歆享之意然後獻生薦熟禮畢分食祭肉無論何親友與家人皆席地坐肉有餘則分送於宗族蒙族之祭祀設影神位亦曰佛凡食及瓜果蔬菜皆備其兄弟析居者須自立佛像或子孫初爲父母立像者方行大祭祭時先祭天地然後於影神位前行領牲及獻

生薦熟禮漢軍人之祭禮尤與他族異其神曰高堂神將祭之始先迎神於祠有端工數人擊手鼓唱神歌以爲贊助主祭者焚香迎神而返至夕先放虎後放鬼種種設備令人難於索解耶質之主祭者亦所不知或曰伊等係唐室舊人所行者唐室之禮及觀其所供之神畫像中有唐王君廓者理或然歟他若回族爲清真教禮拜外概不言神自無所祭故缺之

按祭祀之禮實義在於報本古聖人假神道以設教無非導人以爲善而已乃後世棄其本旨肆意荒幻其說炫惑愚民我國人真理不明專以迷信爲邀福之具宜乎民智之不開也詎知文物日新時代已非神化果能以崇信之誠意用之實學各途除奉祀祖宗外皆本祭非爲諂之義以免之庶既倒狂瀾尙可挽乎此亦風俗人心之極有關係者也

### 演春及耕藉

舊俗於立春前一日地方官恭率所屬出東郊行迎春禮遵依歷書頒行時刻公服祭勾

芒神一杖擊牛三匝以示不違農時之義更於仲春之月遵部定耕籍日期地方官率僚屬耆老詣先農壇致祭推耕禮農夫受以終畝今其禮皆廢弛不行矣惟農家於播種以前自行諏吉於田間行之名曰試犁亦可謂末流之告朔餼羊矣

### 宴會

宴會之禮於每歲上元節前行之俗名曰會年茶先所定之期主人具柬邀賓屆時賓至主人肅客堂下揖讓而升賓至既齊主人請賓入坐列酒殽主人先酌賓曰獻賓答之主又答賓曰酬筵席之設城內與鄉不同鄉間習慣樸素食物不過數品城市則日趨奢靡酒殽必豐美筵終賓謝主人辭出主人送之門外按此即古鄉飲酒之禮也

### 祝壽

祝壽之禮雖不多見然亦間有之其禮爲高年初度親友以壽桃壽麵額幛等物奉贈或賀以詩詞對聯以爲慶祝主人是日供壽星於中堂賓友至向主人行禮由子侄答禮遂筵席以款待之

## 生子及繼嗣

生孩之家先於門外作一表示生男則懸弧於門左生女則設悅於門右三日洗兒謂之洗三七日通知生子者之母家謂之報喜戚友各於彌月以前送鷄卵豚蹄面粉等物謂之下乳彌月之日母家及親友各以繡襖服飾銀鐲銀牌等物或贈資與小兒謂之作滿月主人設筵款客曰湯餅會俗曰吃滿月酒週歲試兒男用弓矢筆墨珠算農具女用刀尺針線珍寶玩物置兒前任兒自取以觀志向名試週歲若無子之人則選同族之子或至戚之子以爲承繼先商允本生父母訂期邀集族長及族中人並村長親友說明原委立證書以存證由繼子本生父母及族長等以次各人畫押然後祭告祖宗禮既成乃受賀主人設筵席款待親族焉

## 築室

築室之禮有二棟梁畢具擇日令木工置其中之屋檁曰上樑是日戚友各以綵布毯氈等物搭樑上以致賀主人備酒席酬謝之曰上樑酒修造完竣親友等以棹椅瓶鏡彩幛

等物贈送以賀其落成主人亦設酒席酬謝之曰賀房酒  
其他關於禮俗之事悉數難終惟不經多見故不贅及

### 歲事

### 假期

此依陽歷而言

### 民國成立

西歷一九一二年各省代表開會於南京選舉臨時總統共十七票孫逸仙以十六票當選乃於一月一日就臨時總統職於南京定國號爲中華民國改用陽歷即於是日爲民國紀元革命至此遂告成功

放假一日

### 新年休息日

放假二日

### 總理逝世

民國十三年孫總理以臨時執政段祺瑞之相邀北來共商國事聞段執政有外崇國信

之宣言違反先生廢除不平等之號召大憤早有肝病至是復發乃留滯天津旋於十二月三十一日入京治療未痊而益劇入協和醫院解剖並用X光治療無效回行轅調養終不愈乃於三月十二日逝世易箐時尚頻呼和平奮鬪救中國不已遺囑葬南京紫金山  
放假一日

### 黃花岡烈士殉國

清宣統三年辛亥即西歷一九一一年廣州黨人復舉革命亦遭挫折遇難者七十二人犧牲之大死難之多爲從前所未有先是孫總理以戊申己酉革命連遭失敗安南日本香港等地皆不能自由居住遂赴美將國內革命事委託黃克強胡漢民二人庚戌即宣統二年謀攻番禺爲清廷所敗先生由美回國邀同志諸人會議於檳榔嶼均現失望之色總理勸勉再四並許爲籌款辛亥即宣統三年各同志仍復謀進行黃花岡在廣東省即諸烈士遇難處  
放假一日

### 國民革命軍誓師南北統一

放假一日

## 孔子聖誕

夏歷周靈王二十一年孔子生於魯史記孔子世家孔子名丘字仲尼其先宋人父叔梁紇母顏氏以魯襄公二十二年庚戌之歲十一月庚子生孔子於魯昌平鄉陬邑生有聖德年十五志學三十而立四十而不惑五十爾知天命六十而耳順七十而從心所欲不踰矩壯歲周流列國道不得行晚乃歸而講學洙泗有弟子三千身通六藝者七十二人刪詩書定禮樂爲後世儒教之宗歷代均有封贈按周時建子自漢以後均建寅加以月有小建周之十一月正後世八九月之交故定於八月二十七日爲聖誕其假期但限於學校 放假一日

## 雙十節

清宣統三年八月十九日即西歷一九一七年十月十日武昌熊秉坤蔡濟民等揭旗起義數月間國內響應孫中山適在美洲本擬回國參與但覺樽俎折衝尤重於城池攻取因未返國而遠道歐美以作外交運動除取得美俄法等國同情外復得英國允許止付



清廷借款制止日本援助清廷及取消各屬地之放逐令因起義在十月十日故稱雙十節即以爲國慶日 放假一日

### 孫總理生辰

舊歷清同治五年即西歷一八六六年丙寅十月初六日今定爲陽歷十一月十二日寅時孫總理逸仙誕生於中國廣東省之香山縣翠亨鄉父道川母楊氏家世業農先生其季也首倡革命肇造共和國之新文化實發生於此日 放假一日

按一年中有假期所以節勞而暢志亦歲事所宜登載也惟新頒改定假期悉依陽歷月日取而冠歲事之首殊與舊俗陰歷不符然隨時通變不妨分明而兩存之

### 事類

此後依陰歷而言

正月初一日爲春節舊俗於上午一點鐘時家家衣冠整齊設神位於院落中拈香燃燭焚紙馬鳴炸炮致敬叩拜發吉言以求順利呼牲畜以祈蕃滋俗曰接神禮成後煮水餃以食謂之元寶湯黎明早起先祖祠而後家長子孫皆向之行禮謂之拜年家長亦分給

家人以錢文謂之壓歲錢食後偕往族黨親友家行拜賀禮族黨親友亦來答拜由元旦至初三日所祀神位前有焚長香者有每日焚香三次者均敬禮跪拜午後乃撤祭品家家於祖宗香案外皆設天地竈王二神位禮亦如祭祖工商之家則皆於初六日開市亦各明燈燭設神位焚紙馬放炸炮焉工商人等互相慶賀如拜年時有財東及股東者須先期報已往之贏絀以定行止不用之傭工人皆於此日清算截止至十五日爲上元節俗稱元宵節是日一切雜劇皆沿街遊行歌舞各工商家晚間亦懸綵燈鳴鑼鼓並演火樹銀花之戲文人學士或設燈謎以寄興趣更煮湯圓以供晚食謂之元宵各家之會年茶皆在此數日中二十五爲填倉節各農家即粮店均向倉廩中焚香拜祭俗稱填倉二月初二日爲龍擡頭日蓋時當驚蟄前後爲龍蛇始振之期各家皆用短香燃火徧置於屋內有罅隙處謂能避毒蟲又由庭內鋪灰道自大門出至井台止謂之領龍是日各家多食春餅三月清明俗稱鬼節人家皆於是日備冥鏹携歛帚掃墓插柳今已改爲植樹節爲全國栽植樹木之期初三日爲上巳古人於此日修楔今亦有於此日遊行郊野者

謂之踏青二十八日爲天齊廟會人家因有灾病許愿心者於此日拜廟焚香以償還之  
四月初八日爲佛誕節性喜佛教者必焚香跪拜十八日爲娘娘廟會即碧霞元君廟會  
也缺嗣之婦人於是日祝禱之二十八日爲藥王廟會醫藥營業之家於是日焚香行禮  
休息一日五月初五日端陽節也今改爲夏節各家簷端滿插艾蒲掛紙葫蘆謂能避疫  
癘小兒於手足皆擊五色綵絲謂之長命縷飲食則必備雄黃角黍涼糕等物十三日爲  
關帝廟會俗謂關公於此日赴東吳之約也又號雨節亢旱之歲皆望此日得甘霖焉六  
月初六日爲蟲王會各村農家及藝園圃者於是日開會宰牲致祭於蟲王議僱看守青  
苗之人謂之青苗會或於是日曬衣曬書焉七月初七日爲乞巧節城鄉婦女咸陳瓜果  
於閨中以祀天孫而令小兒女執線穿針以乞巧十三日爲麻穀節有新喪之家於此日  
設祭奠蓋謂新麻穀結實奠亡者以誌哀謂之燒麻穀十五日爲中元節亦稱鬼節各家  
焚紙掃墓添築墳塋晚間僧道建醮諷經或放河燈路燈以超度枉死者之魂謂之盂蘭  
會八月十五日爲中秋節現改秋節城鄉停止營業市梨桃月餅之食品以分給家人夜

間陳設祭品於月初上時焚香叩拜以祭之謂之供月此與端午爲一年兩大節九月初九日爲重陽節士族或携酒登山謂之登高十月初一日爲下元節亦曰鬼王節家家備祭品掃墓或並焚紙冥衣者謂之送寒衣十一月冬至現改爲冬節或製消寒圖以誌風雪陰晴十二月初八日爲臘日各家以黃米作稀飯謂之臘八粥二十三日以糖祀竈焚灶君之畫像而行禮以送之俗又稱過小年除夕曰爲一年之終家家掛新畫於室貼春聯於門並於家祠灶王天地前均設香案羅列供品並設香斗以供諸神至夕焚香燃燭靜坐不眠謂之守歲又糊紙囊以盛紙錢冥鏹焚於當路謂之燒包袱本家老幼以次叩拜至近戚族亦有至者謂之辭歲至半夜後則又接神而至新年矣以上所述皆依舊歷而言漢滿蒙三族咸遵守其時日今時雖有陽歷猶仍其舊回教則以三百六十日爲一年每逢年期各家皆至清真寺淨身沐浴拜回教主誦可藍經且油炸麵餅俗稱油香共食之或分贈他族之交厚者

按年終之祭祀清明及中元節下元節之祭掃足以動爲人後者之孝思佛誕會端午

中秋之假期與安鋤安鎌開場閉場之休暇亦足以酬勞工者之勤動雖至拜年辭歲開市會年茶亦可辨尊卑之分聯社會之歡莫不有以維持乎風俗獨至上元之花燈廟會之香火男女叢雜曠時廢事誠足敗壞風俗也興利而除弊正本而清源端賴有化民之責者矣

### 娛樂事項

正月爲一歲之始娛樂事惟此時爲多初六日後有演雜劇於城內街市者如龍燈高蹻獅子旱船等類沿街跳舞或唱俚曲逐戶乞錢物謂之太平歌亦稱秧歌鄉間則但集村中子弟喬扮女娘名曰拉花間有男粧如伶人中之丑脚及小生者佐以鑼鼓沿門歌唱跳舞亦乞錢物直至二十日始漸止城鄉各商家亦有置鏡鼓作樂者但過十六日即止耳此外天齊廟會佛誕節碧霞元君廟會俗稱娘娘廟會藥王廟會臨時或有擗平鼓書變彩等等各戲以悅人耳目焉鄉村或有於農隙演戲劇影戲以酬神者雅興人籍以消遣游玩俗謂之耍青上元端午中秋三節各家飲食加厚豁拳行令皆所無禁與度歲同

九月九日登高亦舊俗所沿習但勞工無假耳平日則孫家台驛恆有娛樂場如戲園洛子園等終歲開演不斷皆舊俗娛樂事也今我城鄉學校既多學生等皆知活潑性情運動身體故於受課之暇有擊皮球打鞦韆者有鼓風琴及大正琴者有品簫弄笛及奏管絃者間或有談小說講故事及練習武術技藝者皆從前所不多見而亦自得娛樂之趣焉誠風俗改良之效文化進步之徵也較之毫無所益之舊習慣大相逕庭矣若各處風景之佳有可娛樂載於名勝卷茲不贅

### 勞工待遇

勞工以農工商爲多開原九區之內農爲最多而工商次之依各區所調查待遇之最優者南路四區城內九區次則西路五區又次爲東路一二區又次爲北路三六區又次爲東南路七八區而大致皆相差無多業工商者外省人居其半每日作業均在八點鐘以上平日無假惟每歲准回鄉一次期限一月兩月不等其家在本城或四鄉者則縮短其假期而增多其次數此通例也一年之終由十二月二十日後飲食稍豐至除夕則羅列

肥美必成席焉正月元宵節前朝必食麵食晚必酒筵直至十六日始止此後端午節中秋節九月十七日俗謂爲財神誕日普通有酒食之犒若業工藝者各以其祖師誕日特別宴會用人之例工界有藝徒商界有習學生理者俗稱年輕的以上有工師櫃夥及執事者俗稱掌櫃諸人所賺之酬勞金執事爲最優以下逐漸低減自孫家台立商埠營業各工商移去入租界者甚夥其酬勞金較城鄉稍增每歲正月初六日或十六日定去留謂之工成宴農家之待遇與工商不同春初與主人商妥即任事俗稱上工試犁及安鋤安鎌開場閉場等日食加豐謂之犒勞四月十八日五月五日八月十五日例假休息待以酒食其他特別假期主人或給飯費或不給各村習俗不一亦有工長俗稱打頭工夥俗稱隨幫半工俗稱半拉子牧兒等階級統稱曰年做每日作工均在十點鐘以上其工價有整年零月之別實則整年者僅做工八九個月惟零月則逐月計算焉據調查所得距商埠較近處每整年工資可得現洋百元零月工資每月可得現洋十二三元工長以下視等級爲差稍遠商埠之村鎮工資漸形低減最遠者愈低減然整年工資每年猶可

得現洋八九十元零月工資每月猶可得現洋十元較之工商營業所得利益尙不至懸殊

按舊俗人享有之權利幸福惟勞工爲至少衣食粗鄙無論矣即工作時間與報酬價值比較之亦覺不得其平況資本家恃經濟勢力壓制無所不施勞工者欲去而之他每以別無技能恐難遂其生活故不得不委屈而忍受之皆實業不興人少謀生之路所致耳開邑之民性本能勤樸耐勞生計豈憂其不足但以無事可作每至流爲游民自孫家台設商埠後農產品出口日增糧價陡漲曠土日稀農業漸有起色農工之價值亦增資本家不得不自減其奉養爲僱傭之用就現勢論之雖下級勞工已不若從前之貧苦此亦漸進平等之始基也所惜工商各界未能一致進行僅借農業所生者以爲操縱又風俗之隱憂矣

### 歌諺

### 關於農工者



過了芒種不可強種 緊趕慢趕芒種開鋤 到小滿便開鋤 穀雨種棉花捎帶點芝  
麻 夏至起蒜頭 穀雨前後栽瓜種豆 花見四十日大雨歡歡下糧食若回行工夫  
要漲價 任種重荏不種迎荏 種地不上糞真乃是胡混 清明刮去坎前土農人一  
年白受苦

關於農時者

有錢難買五月旱六月連陰吃飽飯 七月十五定旱潦八月十五定收成 處暑不出  
頭割了喂老牛 六月六看穀秀 五月半高粱沒瓦罐 六月頭高粱沒老牛 三月  
清明麥在後二月清明麥在前 頭伏蘿蔔二伏菜三伏種蕎麥 頭伏苞子二伏穗三  
伏曬子粒 五月小茄瓜吃不了 五月大茄瓜剩不下 豆子開花壠中抹蝦 春旱  
不算旱六月連雨吃飽飯 伏天大雨年頭兒保十成 三春不如一秋忙甚樣綉女也  
下床 雷打清明前窪地種高粱 雷打清明後窪地種黃豆 八月十三下一陣旱到  
來年五月盡

關於氣候者

七九河開八九雁來 九九搭一九黃牛滿地走 雷打一百八十天霜來 臘七臘八  
凍吊頸巴 天河出叉穿得馬掛 天河掉角穿得棉襖 春打六九頭九月九燕子走  
五九六九窮漢子伸手 大雁不過三月三小燕不過四月十八 一重春雨一重暖  
一番秋雨一番涼 最冷不過三九最熱不過三伏 春天看人不不看水 察窪不  
察窪就在六月二十八 先下牛毛無大雨後下牛毛不晴天 不怕十五陰就怕十六  
下 旱時東風難遇雨澇時北風無晴天

關於人事者

車到山前必有路 清官騎瘦馬 若致富半夜即穿褲 若受窮睡到日頭紅 養兒  
不如父咱的房屋人家住養兒強如父人家房屋咱居住 兒孫自有兒孫福何用爹媽  
作馬牛 日月穿梭催人老花開能有幾時紅 要教人不知除非己莫爲 人離鄉賤  
物離鄉貴 人不保心木不保寸 交人交心澆花澆根

按古者太史觀風省俗里巷之俚歌諺語皆得備採於輶軒後世此制不行遂視此爲無足輕重然父老之沿傳兒童之熟誦其辭雖粗鄙不文要皆本歷年之經驗與風俗之習慣而成細味其中皆有至理存焉安得以淺陋而置之乎

### 經濟

經濟一門爲舊志所不載顧時至今日學有經濟專科書有經濟專本實民生貧富所攸分社會興衰所由判而國家之強弱所由成也茲就各區所調查者統計而分別之錄列如左

開原九區之內人民之經濟概況確有不同就衣料食料燃料言之衣料價值鎮鄉較城站稍昂食料價值城站較鎮鄉稍昂惟燃料城站視鎮鄉之價值增加甚鉅各鎮鄉之薪價則視距城遠近以爲差愈遠則薪價愈廉冬日煤炭亦城站銷場較廣然只供爐火之用近間有欲設煤竈者每以無善事之良工而止東南北各區有山柴爲燃料副品可以補經濟之不足亦獨享之利益也再就經濟活動法言之城站皆有儲蓄會及質庫錢號

惟出貨不多或竟不出貸而別圖利益反不如個人之貸欸尙稱便民而利用利率多寡隨時變動不一致多有八九分者至少亦不下四分債期則分以長年短月或有抵押品統由承還保人負完全責任更就人民之儲蓄性言之城鄉富厚之家每歲年終除銷費外所有贏餘必先置買田宅或設商店亦有送會儲蓄者中產以下之家力圖節省以爲儲蓄預備而積寸累銖不辭勞苦尤以婦女爲最甚平日飼牛羊豬鷄等物以冀繁孳生利夏時或耘草或拾麥至秋成有山場者採榛實山楂榛蘼野菜近農田者拾遺秉滯穗冬季向有紡綿織布者今以人工日貴漸形稀少更推其意及於兒童每歲新年後親友賀歲見兒童必餽贈錢幣以表示愛意其母亦爲之儲蓄生利焉以上所述雖無關輕重然因本獲利利復爲本輾轉相生子母增益積之既久遂得巨資可以養勤儉之風可以副生活之望民俗之良何可沒也

### 神道

處文化競進時代固宜破除迷信概不語神然考之禮經凡施法勤事定國以及禦菑

捍患有功烈於民及民所瞻仰民所取財者皆當隆其報酬爲之饗祀亦民生之不可廢者也獨怪民智未開粗鄙近利不用求飲水思源之義而借爲媚神邀福之資謬妄不經沿成習尙牢不可破愚何如也惟是文武二廟節孝義勇二祠爲後世樹儀型爲國家正風化著之國典禮極崇隆前已載之壇廟卷中茲更將城鄉沿用祠廟列之禮俗卷終不沒其實俾關心民俗者因得以證其是非焉

### 城隍

禮大蜡八水庸居七水庸即城隍也其神主厲壇之祀歷代以來唐爵以王然城郡猶未徧立也至宋時郡縣莫不祀焉明去其廟而易之以壇旋改定爲神如各府縣長官之職又由壇而改爲廟其神像或以木刻或以泥塑如長吏狀每歲於七月十五日十月一日共以肩輿舁其像遊於城外刑人之地俗謂出巡開原城隍廟已不行此禮矣院內所有房間現爲公安局佔用設立教練所

### 龍神

四海江河大川各州縣宜有專祠載之會典別無祀龍神之禮龍神蓋卽川神也清時開原舊俗各鄉於諸神廟內並塑龍神像每歲六月十三日爲祀龍王之期其神面目衣冠皆黑色取北方壬癸水色黑之義遇旱時鄉農尤信奉之以祈甘雨城內龍神從前附神廟今祀廢

### 馬神

周禮校人春祭馬祖夏祭先牧是周時已有馬神矣迨及後世隋以四季中之仲月祀之唐宋相因迄無變易明改爲春秋二祭併諸神爲一壇旋止春祭後於永樂十三立馬神祠清無明文特祭開邑馬神舊附火神廟內今祀亦廢

### 火神

其神爲南方火德之神名曰祝融舊俗塑火神像面目衣冠皆赤色取南方丙丁火色赤之義鄉民於朔望及歲始莫不詣諸神前焚香拜祝今其祀亦廢

### 蟲王

害苗之蟲類甚多農人無法驅除乃假神道以禳之詩云去其蝥賊及其螟蠶無害我由  
稗田祖有神秉彼炎火田祖之神即蟲王也我開舊俗鄉農以六月六日祀蟲王今猶有  
行之者

### 衙神獄神

於公署內塑漢蕭何曹參像而祀之此衙神獄神之所由始也舊時每月朔望日守土官  
詣廟行禮今皆停止

### 山神

開原南東各區多山鄉民多供奉山神以鎮虎狼及各猛獸年節朔望時奉香火今仍舊  
土地

全境之土地祠爲最多各鎮鄉村皆有之凡有喪事之家報廟送行以及尋常之祈禱年  
節之報祀均在其處蓋古之社神也

### 七聖九聖

以火神爲主合藥王蟲王苗王牛王馬王財神立祠祀之謂之七聖祠之龍王爲主配上諸神增以山神土地立祠祀之謂之九聖祠每月朔望村人必焚香拜謁年歲豐收雨暘時若或演劇酬神亦有新建廟宇或重加繕修而演劇者謂之開光

### 藥王

自神農嘗百草以療疾病世始知有藥材洎乎黃帝歧伯著作內經世始知有醫術後人立祠塑像祀之衣冠皆肖王者故稱爲藥王相沿既久遂數典而忘其祖至有謂爲唐之孫思邈者查孫思邈有千金方千金翼方等書各三十卷何以有帝王冠履此可知其傳聞之誤開原藥王廟在城東北隅本邑醫學研究會附設其中每歲四月二十八日爲香火會期各藥商焚香拜謁焉

### 財神

禮祭法民所取財用者亦在祀典此財神之祀所由來也本邑之財神廟在城西北隅舊由商會建設辦理祭祀酬神等事每歲九月十七日爲會期各行咸派代表共與於會事



現已廢學務人員以其地設職業中學校

眞武

北方之神斗牛女虛危室畢七宿也原稱玄武雲籠漫鈔祥符間避聖祖諱始改玄武爲眞武本邑眞武廟其神像高大爲純銅鑄成每年以三月三日爲祭期

菩薩

有觀音文殊普賢諸名號謂能救苦救難普度衆生各寺院中皆立像供奉人家婦女信奉者尤多朔望焚香者有之朝夕跪拜者亦有之更或持菩薩齋誦觀音經以明其篤信焉

張仙

其神多爲畫像手挽彈弓上射天狗婦女無子者謂天狗爲祟故皆供奉之以預防而示威蓋謂假神力以驅天狗嬰兒無不得育也迷信之愚竟至於此

呂仙

仙號洞賓又稱純陽故道家咸稱爲純陽老祖鄉民亦多信奉之在所居宅內或設神牌或繪神像朝夕焚香朔望敬禮並有掣籤以下休咎者

### 竈神

禮月令孟夏祀竈說文灶炊灶也釋名灶造也創造食物也淮南子紀論訓炎帝作火官死而爲灶神莊子達生篇灶有髻註髻灶著赤衣如美女雜五行書灶神名禪字子郭周禮大祝掌六祈二曰造註造舊書作灶開境城鄉居民皆供奉畫像於爨舍每月朔望必焚香禮拜年終十二月二十三日夜間祭以飴糖焚其畫像焚香敬送至明年正月一日接神後又設新畫像供奉之

### 門神

門居五祀之一禮月令孟秋之月其祀門鄭氏註秋陰氣出祀之於門外陰也張氏註萬寶告成至秋而入門祀其入也風俗通上古之時神荼鬱壘昆弟二人性能執鬼蔡邕獨斷秋爲少陰其氣收成祀之於門又十二月歲竟乃畫神荼鬱壘像並懸葦索以禦凶開

邑全境居民各家皆貼神像於門即神荼鬱壘也但無專祭祇焚香於門旁以祀之  
以上所列各神多城鄉普通所共祀者其他不經多見名目繁多更僕難終不無遺漏  
今以非關重要姑任其缺別有特許愿心者無論何神位前皆有之或因身遭疾病或  
因事變粹生本意中之希望祈默佑於神靈雖個人團體有不同而其請願於神道則  
一也果能如願相償莫不竭力酬答亦可見人民信仰之深矣

補編 編成後來稿

### 雹神

城西雙樓台西南隅有雹神廟一處所有廟內神像階前旗竿均用整石琢成建於清道  
咸間廟雖不大而全體皆石質亦屬罕有推其原始因該地鄰近各村每值雨雹莫能倖  
免一般迷信神道者遂謂不敬雹神之故因建廟以祀之

按雹本上騰之水蒸汽遇冷空氣凍結而成開原西境西北近沙漠冷空氣之來甚易  
而西南有法庫東一帶之近山北鎮醫巫閭之遠山東有開原東境一帶之近山吉林

長白之遠山皆能束空氣之流通使不得外溢雙樓台附近各村適當其衝雹災之發生勢所恆有與神道何關乃習俗相沿至今難返良可慨也

卷之五 雜著 卷之五 雜著

此書之體裁與前書不同其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

以上所列各書其體裁皆與前書迥異其體裁之新穎與前書迥異

# 宗教

各地之人才不一有高尙之知識者莫不欲獨闢奇徑以範圍乎一世之人心而使之信仰焉此宗教之所由起也我中華以儒教立國孔子出而集羣聖之大成以時中爲宜而不越乎庸言庸行之正此所以不名宗教而歷代宗之不容移易者也乃自漢唐以還昌言佛老至清季而門戶洞啓教士紛來民國肇興更與人以信教自由不復爲心理之束縛蓋亦謂道並行而不悖理日出而不窮任人行其心之所安而已

## 佛教

亦稱釋教其教旨爲天堂地獄生死輪迴之說隱寓警俗之意其教祖爲如來胡俗信奉最深自東漢明帝時流入中國下逮南北朝北邊淪於五胡其教乃益張隋唐時高麗僧一然著名遼東迄遼金各代俗皆佞佛國家亦沿唐舊制設置僧官各京府有督僧錄明清準此改爲僧錄司掌管諸僧其支派以衣色爲別有黃紅白青等派開原城西大灣屯廣法寺老虎頭廣喜寺城南四寨子村南寺舊有喇嘛十數人黃衣派也四寨子村南寺

今已圯廢惟大灣屯老虎頭尙有住持在焉城內崇壽寺遺傳最古其門外浮屠高聳雲際即弘理大師葬處當日佛教之盛可知城東北龍潭寺亦有僧侶住持皆青衣僧也惟紅衣白衣二派爲本境所無

### 道教

其教旨以清靜無爲爲主教祖爲老子入其教者不娶妻室戒酒茹素蓄髮寬袍如古代衣冠清時禮部設道錄等官主管道觀等事開境道觀絕少惟有夥居道一種清時充道丁差其娶妻生子飲酒食葷與常人同至喪家招之諷經則道冠道服高坐經臺儼然道貌焉其持說亦謂能免人罪孽可脫去地獄諸苦難與佛教同

### 回教

此教來自西域亦曰天方教教主爲默罕麥德所敬奉者爲可藍經其教旨以殺敵致果爲主惟回族人崇信之其教規不吸烟不飲酒不食豬肉婚喪禮俗均與漢人迥異回民性喜急進富於保種思想惟因飲食難與他族合故少工商合資營業率除富家能獨立

外其餘皆作小本營生以供用度或有以屠牛爲業者其宗教師曰阿訇屠牛必邀阿訇不得自己操刀婚喪等事亦邀之其首領稱回民頭公私各事項每舉爲代表如漢人之村正故共呼爲老表其供奉教祖處清真寺開邑城內東街及南門外爲其居集處東境村屯亦間有之學制變更後教中之知優優良者亦設清真小學校以教育各回族子弟其欸多回民自行籌措並由本邑教育機關請准津貼按此則回族之在開邑亦漸有同化漢族之意但以域於舊俗鮮所變通即有一二人明察及此欲矯正之而一傳衆咻終莫能遽挽也繁露文集載有回籍生員尹三聘所撰禮拜寺碑文採錄於後

新修禮拜寺成入廟思敬羣情熙熙易所言王假有廟聚以正者可以觀其象矣然則即此人心之聚可不懍以法制之嚴乎衆皆伏而聽爰舉雍正七年四月七日聖諭讀之曰直省各處皆有回民居住由來已久既爲國家之編氓即爲國家之赤子朝廷一視同仁回民中出自文武拜官受爵洊登顯秩者常不乏人讀至此衆皆歡然稽首叩地曰仁之至矣又讀曰回民有禮拜寺初非作奸犯科惑世誣民者比地方官吏不以



回民異視而以治衆民者治回民則賞善罰惡之令自無不行讀至此衆益欣然稽首叩地曰義之盡矣又讀曰奉旨禁宰牛隻乃勸民務農勤稼所以重惜力耕之物命聞回民頗有私自屠宰者此即居心殘忍不務本奉法之一端特此詳加誨訓爾回民當知率由禮義毋恃強陵弱毋倚智欺愚儻謂別爲一教怙惡行私則是冥頑無知甘爲異類憲典具在豈能爲爾寬假讀至此衆乃汗流浹背如怨如慕泫然出涕而不能爲一言嗚呼觀於此可知化之入人者深而民之歸善者速也吾因之有感矣古者中國之地多華戎雜居其在春秋如楚之陸渾衛之戎州魯之徐戎之類夥矣衆矣而何以不見於秦漢以還秦漢而後如晉之鮮卑魏之拓拔唐之突厥之類亦夥矣衆矣而何以不見於五代以還由是言之必有漸染華俗久而與化抑或當時別有位置如元色目之人告身爲民之類是以道一風同畛域俱泯我回民之入中國已歷數百年而往代相沿獨自爲教在朝廷聽之固爲覆載之仁在我輩安之實屬偏私之見也方今回教之住各省者衣服文字旣與華同獨飲食一節有所隔閡是以婚姻不通興作難

夫考之坤輿圖說有曰回回不啖豕故諸國無豕是其始亦祇以口腹嗜好或偶有避忌遂相習成風初非有關於名教之重作述之原拘此小忌相爲彼己豈聖天子一視同仁之意乎夫縫掖章甫迹殊宋魯聖人之與時推移也易窮則變變則通通則久我輩生齒日繁而爲教所限與齊民婚姻不通與作不共資生之理日蹙實自敝之道也其何以久乎易於渙曰渙其羣於革曰革而當鄙占如斯而難以戶說惟望我輩中位致通顯識超凡庸者推千古之通義破陋習之拘墟告之吾相而奏之吾君爲國家贊畫一之治爲回民裕久遠之圖則所以被殊恩蒙寵賚者當不在尋常意計中也謹誌斯言以俟來者 此篇碑文未詳爲何時所製但能切中回族之積弊足以破其相沿之錮蔽導以新文化焉是亦本書所樂於登載者也尹爲瀋陽回族人乃獨破除舊習別開生面特撰此文殆回民中之先覺者乎此文從遼陽縣志中錄出

### 天主教

天主教之傳教士終身不娶其教友之守童貞者亦間有之教士之名分視耶蘇教牧師

較爲尊貴每以司鐸自稱以跪見禮待其教友教友稱之曰神甫所傳之道亦無異於基督所用之書亦即新約舊約特分門別戶教規不同其供奉者爲聖母馬利亞開原天主教堂東南大街路東成立於光緒二十一年三月四日教徒頗不乏人二十六年拳匪亂起城內教堂付之以炬城西雙樓台東街所設天主教堂及威遠堡門天主教堂亦同時焚燬清帝廻鑾後賠款條約成立仍就故址再行修築計其歷任經理教堂之人有唐神甫裴神甫杜神甫楊神甫葛神甫博神甫等人同光之間教士袒庇教徒遇有訟事教徒每以教士爲護符教外人多有冤抑莫訴而理不得直者遂引起人民讐教之思想拳匪之禍大半種因於此庚子議和各國教會以此爲前車之鑒乃開傳教會議嗣後傳教士不得干預中國內政至今二十餘年民教相安無事更無教案發生惟假信道者不能復施其陽奉陰違之伎倆不免失所倚賴耳

### 耶穌教

亦稱基督教與教友以平等待遇且可獨身信奉不及一家較之天主教無教皇之尊嚴

無神甫之束縛無全家信奉之挾制故耶穌入中國雖晚於天主教而信奉者轉多開境內耶穌教於光緒十五年在縣城內東街成立教堂招集教友並修牧師府英人魏雅各爲常駐牧師以廣宣傳又於境內設分會十三處在城北者爲開原站威遠堡門在城東爲者李家臺在東南路者爲馬家寨夏家堡子趙家溝大台在城西者爲新安堡古城堡慶雲堡在城南者爲六寨子高麗屯庚子之亂所立城內教會及各鄉分教會多遭燒燬和約成後英人畢德志復爲常駐牧師經英人英雅各等重修禮拜堂有英人譚文倫趙恩普等輪流經理又成立六縣二十四處支會民國八年經會衆聯名資聘華人何紀三爲本會牧師由此改稱開原中華基督教會現在男女信徒約八百七十餘人

### 在理教

其教起於明清之際清旣代明明之逸民有不忘故國者乃組織此教爲恢復漢族勢力計大旨禁戒烟酒勸人立志行善相傳有五字真言教中人不准道破有道破者謂之背教規清時某直督任內軍中兵士多信此教某直督詳詢五字真言之實在則一心保大

明五字蓋當鼎革之時恐遭禍不敢明言耳令改之乃改爲觀世音菩薩五字仍嚴守秘密不告他人尙何取乎開原在理教現時亦不甚盛惟忌烟者尙喜入會以絕嗜好其聚會處所皆臨時指定無一定之地點教中之首領共稱之曰大爺作會之期必先通知各教友屆時設筵高會焚香吃茶由首領當衆演說稱曰開釋所有各費在會教友均攤

無爲道教

附混元門

此教亦稱爲無涯道無教義之可言亦無內容之可考業農工者往往有之奉此教者有時爲人諷經禳災喪家擇日出殯或葬埋後邀其人至所居舊宅書符念咒敲銅鐘灑雜糧以驅鬼祟俗稱打掃屋子此等教徒各處皆有而不多於社會猶有所用又爲混元門教入其教者不如輩戒煙酒每日燒香禮佛亦自稱能超度男女雖無所用而各處乃多有之

## 兵事

開原之兵事由三代以及秦遠無可考自漢武北逐匈奴始有兵事於遼東而於開原一部分未能特別記載下迄南北朝各胡族爭地爭城互相攻擊惟開原尙無兵事之紀唐征高麗不無波及宋時遼與金先後代興開原爲其必爭之地故設京設府兵備尤嚴明與清設衛置州縣固邊疆兵防若何其重要也民國蠲農減武備而修民治所以保境內之治安雖未嘗無警甲然皆籌備於地方視昔日之規模迥不侔矣爰取歷代之兵事列於下以供參攷焉

遼 遼史本紀載太祖平渤海次扶餘城有黃龍現於城上因更名爲黃龍府查黃龍府即今開原縣舊屬東京開泰九年始遷於東北逮女真日強邊境戍兵由東京沿女真界極爲完整蓋所以防之者至矣兵機掌於北樞密院當時兵制凡人十五以下五十以上者皆隸兵籍正兵一名馬三匹打草穀守營舖之家丁各一人人鐵甲九事馬轡韉馬甲皮鐵視其力弓四箭四百長短槍鎗銖斧鉞小旗鎚錐火刀石馬孟秋一斗杪

袋搭鈔傘各一縻馬繩二百尺皆自備

金 查金史收國元年正月太祖自將親攻黃龍府八月遂克黃龍按黃龍爲開原故地是遼之備金以黃龍爲扼要金之攻遼亦以黃龍爲必爭也其兵制都統以下曰萬戶萬戶以下曰軍師軍師以下曰猛安以十穆昆爲猛安以三百戶爲穆昆平時隸樞密院行軍時屬大元帥天會五年調遼東民兵從伐宋熙宗天眷三年詔歲給遼東戍卒紬絹有差厥後光元二年以兵額缺少並籍遼東客戶爲軍

元 至元十二年遣官僉揀遼東蒙古達魯齊千戶百戶子弟皆出軍其兵制男子十五歲至七十歲僉爲兵十人爲牌上馬則戰鬥下馬則屯聚牧養凡幼孩稍長曰漸丁十九年僉發漸丁家二丁以上存一人餘皆充軍二十年行造新附軍籍册二十九年以咸平東京所屯新附兵五百增戍女真地其不出戍他方者謂之鄉兵

元初僅設南京二萬戶府於開原耳至元四年改遼東總管府後又改爲開原路當日開原之兵備日增一日概可知矣

按蒙古已滅金而女真遺族居於遼東者部落尙夥元亦知之而嚴爲之備且爾時金之元氣已傷非一時所能恢復故必休養生息以潛增其勢力宜乎開原之兵事元代不多見也

明 初兵制設軍衛法有衛有所連比以成之一衛五千六百人一千戶所一千一百二十八人一百戶所一百一十二人設一總旗名十小旗名於每百戶內此其大致也隸大都督麾下者都指揮使司十有三以統轄各衛所開原爲三萬遼海二衛地洪武十七年命將覈遼東定遼九衛官軍之後歲遣公侯較沿邊士馬以籍上以是定逃軍之降罰又命軍丁習匠藝以備用以舊定衛所屯田軍士額爲不便而更定之又免衛所軍士原籍戶下一丁茲舉大略如下

### 兵額

開原兵額統於參將部下共四千八百八十九員名

中固備禦城堡兵一千六百二十一員名



開原備禦九堡兵三千六百三員名

開原馬軍一千一百員名

步軍 缺

屯軍 缺

鹽軍 缺

鐵軍 缺

三萬衛馬軍

步軍

屯軍

鹽軍

鐵軍

遼海衛馬軍七百八十一員

步軍三百三十八員名

屯軍

鹽軍

鐵軍

據全遼志所載各城衛兵額均有馬步屯鹽鐵五項軍士數目茲因蒐輯未全姑列名而缺其無者焉 按明季遼東之軍馬步軍而外有屯軍以事屯種有鹽軍以供食用有鐵軍以修器械而皆由地方招集其初軍儲充足在操者又有幫丁招集猶不難也逮至季世軍務日繁死徒流亡不過十存六七屯種鹽鐵日就廢弛宜其不振也

軍器

火器

銅三將軍四礮

銅佛郎械九

抓郎械一十五

神鎗

一百九十三

九龍口

嘉靖丙午巡按張鐸錄

連珠鎗

一容十子十發則百彈齊飛嘉靖甲子巡撫王之誥造

千里鉤 形簡勢迅一發洞中嘉靖乙丑巡撫李輔製發給各衛

### 糧賞

旗軍每一名月支米一石千戶以下每官一官一員月支米二石指揮以上每官一員月支米三石閏月照支每歲前六月支米後六月折銀每米一石折銀二錢五分地方荒歉加折或倍之旗軍月支外有年賞綿布四疋棉花一斤八兩折銀九錢歲冬支給鹽鐵屯軍俱同官員月支外照品級數折鈔每石折鈔銀四分五厘是爲俸銀二季關支守哨墩軍出哨夜不收艱苦迥異歲冬頒給衣鞋公差廩米客兵糧料各因職務大小戍守遠近爲豐減操馬每匹春支料豆日三升冬折色豆一斗折銀二分草日支一束驛馬關支准是驢頭有差

按明季時開原北徭強鄰實爲邊防重地觀其設備不謂不嚴惟以統馭失宜事權不一武人總力征經營往往爲宦豎牽制使不得盡其才遂致邊疆莫保有兵而不足恃焉

### 馬政

明代遼東馬政由官辦理太僕苑馬二寺掌其事太僕寺專司提督點視孳生馬匹成化十四年兵部尙書余子俊題准歲四月十月二次奉勅按行各營衛點視喂養失宜者責限賠償職官作弊及抗違者量輕重罰處年終填寫冊本進上以備稽查開原撫順二城歲例召諭海西等衛夷人每進馬一匹入市驗收開原市首創於備禦鄒溶今縣城東有馬市堡即當日之馬市也額驗一千聽候官查呈准撫鎮衙門給官領赴寺印烙騎操椿柵銀者馬匹或倒死走失由團營官軍分出柵銀椿銀解送廣庫聽候貼併買馬至嘉靖三十七年始將以前柵銀拖欠蠲免椿銀暫停

苑馬寺原轄昇平新呂遼河長安市永寧六監每監各屬四苑共苑二十有四後裁存

永寧一監清河深河二苑

按今縣境內自城東北來之濛河舊名大清河自城東來清之河舊名小清河養馬大屯正居二水之間又與馬市堡甚近疑其地即明之清河苑也

原額恩軍

四百六十戶草場地共五千二百六十一頃有奇嘉靖丁酉本寺卿馮時雍點視二苑見牧童騾種馬并駒騾僅二千九百二十七乃擬定兒騾種馬兩苑以四千爲額本苑各戶軍餘五人共攢一槽領養騾馬四匹搭配兒馬一匹遇有倒失虧駒十人賠補種馬老損

及駒子短小俱估計時值准某賣銀納官

按此法規畫雖具而久則弊生或虛報數目或舞文影射地方應用非私取於民即充以種馬况更以賠償增人苦累無所取也

清 太祖定旗兵制八旗子弟人盡爲兵蓋欲強滿族以自衛也太宗征服諸藩世祖入主中夏兵力惟八旗最強逮聖祖平三藩世宗征青海高宗定西疆猶能主以旗兵而以綠營輔之開原旗兵爲多除駐防之旗兵外前後從征效力之人洵非少數仁宣而降多值承平而旗兵雖有舊額不習操練未免名存而實亡然其制不可沒也書之於下

清康熙二十一年開原設城守尉一員佐領一員防禦七員二十七年增設漢軍驍騎校一員滿洲驍騎七員巴勒瑚即巴爾虎佐領一員驍騎校一員倉官一員筆帖式一員委官九

員屬下舊設滿洲兵八百五十名蒙古兵五十名漢軍兵五十名巴爾虎兵五十名共一千名至乾隆二十九年防禦移駐塔爾巴哈台一員兵移駐塔爾巴哈台九十四名旋於三十年裁兵五十一名所餘實兵數八百五十五名鐵匠十名後增設開原捕盜營歸直

隸總督兼轄時有匪警由地方官請調客軍駐劄光緒二十六年拳匪肇亂駐防之嘉字軍聞俄軍北至潰出城西遂不復成軍二十九年設立保甲三十一年冬改爲警察額設警察一百名三十二年又改巡警局以保境內治安且就各村屯每地一日抽糧八升四合用設鄉防暫代鄉警繼而各鎮鄉巡警分局後先成立旗兵捕盜營均取消鎮鄉防兵爲預警民國以來改預警爲保衛團又改爲保甲因地方未靖並有巡防隊駐防近來改保衛團爲巡警隊聽公安局指揮

按有清兵力最爲勇健其平日練習亦極注重如八旗兵逐日習射春秋合操兼習騎射鳥槍卽以此爲三年甄別法甚善也惟沿習旣久漸形玩怠借朽器冒開銷視甲額爲利藪遂至軍械敝壞而不可用挑選荒疏而不能嚴宜其積弱不振也

### 馬政 續志

有清出征之馬上自王公下及護軍領催均定馬額以備用除現任官得養馬餘悉禁之尋許武科及兵丁捕役等養馬康熙元年禁民養馬三十五年敕出征兵一人馬四匹五

十一年覈定軍中馬數大學士尙書左都御史十六匹侍郎以下遞減經略大將軍各二十五匹副將軍以下遞減分養於都城外熱河及各莊頭與直隸標營圈馬之設始於乾隆二十八年滿洲八旗養馬二百匹今城西城南皆有馬圈  
子屯疑即滿洲圈馬處五十九年撤圈分給各兵拴養嘉慶十二年諭成親王永理議復圈馬大學士戴衢亨等會議立章程十餘條圈馬仍舊道光末年廢後不復籌同治元年雖以馬政廢弛嚴諭整頓迨於末葉厲行新法舊時牧政益廢不講矣



歷代兵戰紀略

漢

桓帝時鮮卑大人擅石槐勇健有志略南抄中國之沿邊北拒貝加爾湖近傍之零

丁東邵吉林西境之夫餘

當時開原為夫餘屬地

西擊天山北路之烏孫盡據匈奴故地朝廷發兵

擊之不能勝

晉

時慕容廆破扶餘其王依慮自殺其子依羅求請援助東夷校尉何龕龕使遼東都

護賈沈救之廆遣其將孫丁率騎邀之於路沈力戰斬丁遂復扶餘國

北齊

武平末高寶寧為營州刺史鎮黃龍周師將攻鄴寶寧率驍銳并契丹靺鞨萬餘

騎將赴救至北平聞鄴都不守寶寧復歸營州周遣使招慰寶寧却其勅書還據黃龍

修戰備

黃龍即開原城北黃龍塞也

唐

總章元年遼東道行台大總管李勣擊高麗拔扶餘等城分其地州縣之彼時扶餘

地面遼闊開原為其西南境

遼

契丹大人阿保機侵伐四鄰擴張鎮城東向擊降渤海國北向侵女真豕韋諸部西



向侵略回紇

渤海國即今朝鮮及滿洲境

金 遼主發渾河北諸軍益東北路統軍司備金主阿古打聞之謂其下曰遼人知我

將舉兵集諸路軍備我必先發制之無爲人制乃集諸部兵得二千五百人以擊遼  
渤海軍攻金左翼衆少郤遼兵直攻中軍金主射殺遼將耶律謝卜衆從而進遂勝遼

渾河在今縣城東南界又名小遼水

元 滿洲之地爲蒙古鐵本真用兵力征服世祖即位後納延叛開原路宣慰達春力戰

郤之軍懿州州人羅拜道傍泣曰非公吾屬無遺種矣金將葛不哥蒲鮮萬努僭號於  
開原元命王榮祖副撒里台討之葛不哥走死禽蒲鮮萬努東土悉平

明 成化四年摩羅歡犯遼東三萬衛都指揮劉旺與其子俱戰歿於古城堡成化七年

歐信充總兵官鎮守遼東累破敵於扶餘三萬衛威振邊陲萬歷四十六年明經略楊  
鎬分兵出塞令開原總兵馬林開原道潘宗顏都兵四萬由開原合葉赫兵出三岔口  
清兵擊之林大敗宗顏全軍盡歿時葉赫貝勒金台石布揚古納助明兵與宗顏合至

中固城聞明兵敗遁去六月清太祖統師四萬征明開原行三日大雨河漲道濘渡口水溢軍行未便諭貝勒大臣先進兵瀋陽以疑之遂發兵百人向瀋陽殺三十餘人而還使人偵視開原無雨道不濘河水可濟乃率大軍進薄開原城下明總兵馬林副將于化龍權開原道事推官鄭之範參將高貞遊擊于守志守備何懋官等嬰城固守城上少列兵餘皆陳四門外清兵設楯梯進攻而以偏師掩擊東門外所陳之兵敗之明兵爭入城填擁于門清兵奪門戰而攻城之兵雲梯未佈即踰城入城上兵四面皆潰城下三面兵見城破驚竄清兵據門堵禦壕不得渡盡殲之鄭之範先遁得脫馬林于化龍高貞于守志何懋官皆陣歿清太祖登開原城坐南樓偵者以鐵嶺衛有兵三千來援馳告諸貝勒率兵逆戰明兵望見即奔清兵二十人追及之斬四十餘人清太祖駐營開原三日籍所俘獲舉之不盡論功行賞乃班師

清 同治初元有流賊王五綽號滾地雷聚賊數百名由邊外竄入本邑西境官軍從明安碑渡河擊賊賊偵知預先埋伏俟官軍半渡擊之故致於敗

同時又有劇賊徐占一者亦嘯聚於城東柳隴巷知縣海盛窮于捕治乃親至徐占一營招降並以勦賊之事委之境內粗安未幾京兵破賊於朝陽坡匪亂始已

光緒元年有潘海者迷信邪教倡亂於縣境東北一帶聲稱能驅使神將並紙人紙馬期以中秋舉事招集多人高搭法台日夕焚香誦咒謀爲不軌城守尉溥公英聞警立派八旗馬隊兵往勦潘海身立法台誦咒無靈自焚死官兵捕獲從亂者數十人均與正法而旗兵隊長札某亦於搜捕時被匪刺傷身死事上奉旨獎札某世襲雲騎尉

光緒二十六年因拳匪之亂俄軍入境時城內有嘉字軍駐防俄人至日勒其交卸槍械該軍抗拒遂乘夜中西門突出而逃一時城中土匪乘機焚掠有嘉字軍哨官李雲章者聲稱奉督憲公文令其招隊一營在開原彈壓地面是夜乘土匪焚掠之際擒獲數名立斬以徇城內稍安

時又有康樹德帶逃兵二百餘人攻破雙樓台燒燬台子溝而去

此外流賊安國聚衆於和順屯孟璽亭盤踞於遼河套均大肆捐搶民不聊生而孟匪

之聲勢尤大後皆爲俄人擊散

光緒三十一年二月初八日俄軍爲日本所敗退至開原分五路北行東由清河溝中穿城西由三台子及鐵路綫慶雲堡等處退至十三日始盡日軍尾追之至城北黃龍岡遂屯兵守險以待凡城東山險以及各要路均有日人據守相持約一月餘突於三月十九日俄軍從東北馮家屯攻起自辰至未礮聲不絕彈丸飛入城內居民惶惶至申刻日軍礮隊始到開礮還擊俄人乃退

民國 民國元年舊歷正月初四日辰刻鬚匪于小釘子破城焚縣署放監獄時巡防營郝哨官陣亡官兵均烏獸散幸賴商務總理羅玉璞及衆紳等出而應付城內秩序始得保持當于匪入城之逾日又有戴洛秀等隊二百餘人由鐵來邑夜間陡肆焚掠被城中之匪擊潰突城逸去至初九日辰刻省中派兵來剿鏖戰一日嗣因匪中彈丸告竭始引隊出東門而去 以下兵戰事均誌於警甲卷茲不贅

按開原東南一帶山林叢雜匪人易於潛藏小孫家台租界地尤爲猾匪逋逃數頻年

以來境內搶劫綁票之事無歲無之近雖賴有警察隊及各鄉保甲聯絡分防而此仆  
彼起仍不免時有所聞居民之惶恐每於青障起時爲尤甚近雖稍稱安靖尙未知後  
此何如也

柳道於歲暮時入維多利亞島直趨海邊築壘以禦倭人由維多利亞島開往其地  
該島海峽之東港內海峽亦築壘以禦倭人由維多利亞島開往其地  
兵部法知開河我乘風正南際際開河開河開河開河開河開河開河開河開河開河  
味國日新欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽欽  
國中政府雖難據乘此際開河開河開河開河開河開河開河開河開河開河開河開河  
陣區匪徒亦難據乘此際開河開河開河開河開河開河開河開河開河開河開河開河  
軍部西由以海軍總司令官爲首至十三日始由日軍星辰之至其北黃川  
至該三十日始由日軍總司令官爲首至十三日始由日軍星辰之至其北黃川  
文要總司令官爲首至十三日始由日軍星辰之至其北黃川